



ATASSUT

2016/34-1

Siverth K. Heilmann

06. 05. 2016

Kalaallit Nunatsinni aalisakkat qaleruallillu tunisassiassatut qaqinneqartartut ingitaqarani tamakkiisumik tunisassiarineqartarnissaat anguniarlugu Naalackersuisut UPA 2017-imi nassuiaammik saqqummiusseqqullugit peqquneqarnissaannik Inatsisartut aalajangiiffigisassatut siunnersuut.

(Inatsisartuni ilaasortaq Jess Svane, Siumut)

Inatsisartuni ilaasortaq Jess Svane, Siumut, Kalaallit Nunatsinni aalisakkat qaleruallillu tunisassiassatut qaqinneqartartut ingitaqarani tamakkiisumilli tunisassiarineqartarnissaannik, aalajangiiffigisassatut siunnersuuteqarninnut qujanarujussuaq, imatullu ATASSUT sinnerlugu naalisarlugu isummorsorfigissavarput.

Siunnersuuteqartup tungavilersuuteqarnermini ersersippaa, ullumikkut Naalackersuisooqatigiinni qulequtarineqartup anguniarneqarnera pingaarnersat ilagigaat, oqalliseruusaaginnaratali piviusunnortitsinissaq kinguneqartitsinissamillu isumaq ATASSUT-miit assut taperserparput.

ATASSUT-miillumi inuussutissarsiutitta pingaarnersaanni, aalisakkat suulluunniit, aalisarnermi pisarisuukkat ilanngullugit qaqinneqartut igiinnarneqaratillu, aalisartunik nunattalu karsianut tamakkiisumik aningaasarsiutitut isaatitsiviulernissaat angusariaqaleranik, isumaq taperserlugu ingerlateqqipparput.

Aalisakkat qaqinneqartut, Island-imi Savalimmiunilu aningaasarsiutigineqarneri tunisassiarineqarnerilu, nunanut assigiinngitsunut politikkeritut angalasarnitsinni, misilittagarineqartut pitsassuit takullugillu paasisaqarfigisarpagut aammalu isummorsortarnitsinni tunisassiorfiutigut piumasaqarfiginerunissaannut ATASSUT-miit kaammattuutit ikittuinnaasimangillat.

Taamaattumik ATASSUT-miit Naalakkersuisut UPA 2017 nassuiaammik saqqummiussaqaarnissaq sioqqullugu, aalisakkanik tunisassiorfiutitsinnut piumasarineqartariaqarpoq, minnerpaamik nunani sanilerisatsinni misilittagaasut ilinniarfiginissaat siunertaralu paasisassarsiorfigineqassasut.

ATASSUT-miit neriutigaarput, oqaannartoqassanngitsoq pissutsit ilisimallugit, takorusupparpulli alloriartoqarnissaq aamma aporfeqarsimagutta, sunaana ukiorpassuarni kinguarsaatigigipput?

Taamatut ATASSUT-miit oqaaseqarluta, siunnersuut taperserujussuarlugu suliap aappassaaneerneqannginnerani, aalisarnermut ataatsimiititaliamut ingerlatinneqarnissaa isumaqataanerput matumuuna nalunaarutigaarput.

Qujanaq.